

Za
4296

Christliche Leichpredigt/ bey dem
trawrigen Begräbnus

X 2047398

Des Edlen/gestren-
gen vnd Ehrenuesten/ Rudolphen
von Bünan vff Krebs/welcher den 16. Octo-
bris, des 1603. Jahrs nach Mittag vmb 3. Uhr / in
Gott sanfft vnd seliglich eingeschlaffen / vnd hernach
den 26. desselben Monats/in der Kirchen zur Lieb-

UNIVERSITÄTS-BIBLIOTHEK
HALLE
(SAALE)

Stadt / Christlich vnd ehrlichen zur Er-
den bestattet worden
ist.

BIBLIOTHECA
POMERANICA

Gehalten durch
M. Iohannem Simon Iuchsensum Francum,
Pfarrern zur Liebstadt.

Gedruckt zu Dresden/durch
Hieronymum Schütz.

Inm Vestungen Edlen vnd Ehrenuesten Hans Wolffon von
Pommigkhan auff priuilegij & sinem vrbegünstigtem Inigkter autor dat.

810

**Der Edlen / Vielehrentugentsamen
Frawen Saren / des Gestrengen / Edlen vnd Ehrenue-
sten Rudolphen von Bünow auff Krebs / seligen / Wittwen /
meiner groszügigen Frawen vnd geneigten
Förderinnen.**

Gottes Gnad vnd Segen / neben Christlicher Gedult vnd besten-
digem trost / durch vnsern HErrn vnd Heiland Iesum Christum /
samt meinem andechtigen Vater vnser zuhorn.

Edle Vielehrentugentsame Fraw / Nachdem ihr /
neben ewren geliebten Brudern / dem Edlen / gestrengen vnd
Ehrenuesten Casparn von Schönberg vff Keinsberg / vnd Schwestern /
vnlangst von mir eine Abschrift der einfeltigen Leichpredigt / so bey dem
Begrebnus ewres hergallerliebsten / vnd nunmehr in Gott ruhenden
Juncters alhier gehalten worden / günstiglich begehren lassen:

Als habe demselben billigen suchen / sonderlich weil solches Gott zu
ehren / dem verstorbenen zu Christlichen gedechtnis / euch vnd den erort-
gen zu trost gereiche / ich billich gung thun / vnd deme nicht wiederstre-
ben sollen. Vnd vberschicke euch demnach dieselbige auffgezeichnet / so
gut als sie dazumal von mir / mit trawrigem Gemüt bedacht vnd für-
bracht worden! Demütiglich bittende / ihr wollet mit solchen meinen ein-
faltigen gedanken vorlieb nemen / vnd alles im besten vermercken. Der
Allmechtige Gott / so euch diese schwere last selber auffgelegt / wolle in euch
ware Christliche gedult vnd bestendigen trost wirken / euch gnade verleih-
en / das ihr solch ewer Creutz vnd betrübten zustand mit seiner hülff nicht
allein vberwinden / sondern auch dormal einste / zu bestimter zeit vñ stund /
nach dem willen Gottes zu ewerm lieben Junctern kommē / vnd neben ime
im ewigen Leben dieses ewres ihigen grossen erlittenen verlusts vnd trüb-
sals / für dem Angesicht Gottes / in ewiger frewd vnd herrligkeit / reichlich
ergetet werden müget / Amen. Signatum Liebstad / den 14. Nouembri /
Anno 1603.

E. E. E.

Demütiger

M. Iohan Simon
Pfarrer daselbst.

W Liebte im Herrn

Christo/ Es spricht der weise Man
Syrach im xxxviij. Capitel. Mein Syr. 37.
Kind/ wenn einer stirbt/ so beweis
ne ihn/ vnd trage ihn/ als sey dir gros leid geschehen/
vnd verhülle seinen Leib gebühlicher weise/ vnd
bestatte ihn ehrlich zum Grabe. Du solt bitterlich
weinen/ vnd hertzlich betrübet sein vnd leid tragen/
darnach er gewesen ist/ zum wenigsten einen tag
oder zween/ auff das man nicht vbel von dir reden
müge. Vnd tröste dich auch wieder/ das du nicht
traurig werdest/ denn von trawren künnt der tod/
vnd des Hertzten trawrigkeit schwachet die Kress-
te. In diesen Worten lehret Syrach/ wie wir vns
zu der zeit verhalten sollen/ wenn vnser Herr Gott
bey vns einen eingriff thut/ vnd die vnserigen/
durch den zeitlichen tod/ aus dieser Welt/ für vn-
sern augen/ zu sich ins ewige leben hinweg raffet/
Nemlich/ wir sollen sie Christlicher gewonheit nach
beweinen/ vnd doch im weinen eine gebühliche
masse halten/ darumb/ das vbriges trawren vnd
weinen am Leibe schaden bringet. Darnach/ das es
den verstorbenen nichts hilfft/ denn da ist in dieses
Leben kein widerkommen. Vnd zum dritten/ das
der verstorbene in der Ruhe liegt. Es ist nicht vn-

recht / ist auch nicht wieder Gottes Wort / wenn
man bey Christlichen Leichen betrübet ist. Paulus
Röm. 12¹ spricht / Weinet mit den weinenten / Röm. 12. vnd
Spr. 22. Syrach / vber einen Todten pflegt man zu traw-
ren / denn er hat das Licht nicht mehr. Joseph be-
Gen. 49. trawret seinen alten lieben Vater Jacob / als er ver-
schieden / vnd zu seinem Volck versamlet ward / Ke-
schel auff sein Angesicht / weinet vber ihm vnd küßet
ihn. Die Witwe zu Nain weinet hertzlich / da sie mit
Luc. 7. ihrem Sohn zu Grab gieng / Luc. 7. Martha vnd
Maria liessen bittere threnen fallen bey dem Grab
ihres Bruders Lazari / vnd brachten dem Herrn
Christo so nahe mit ihrem weinen / das ihme
Joha. 11 gleichsals die Augen vbergiengen / So sehen wir
auch das noch heutigs tags viel fromme Leut vber
dem absterben der irigen sich sehr bekümmern / vnd
bitterlich weinen: Denn da beweinet ein trew Ehe-
genos das ander / ein Geschwister das ander / ein
gut freund vnd Nachbar den andern / da beweinen
die Eltern ihre liebe Kinder / die Kinder ihre liebe
Eltern / vnd können sich des weinens nicht gantzlich
enthalten / denn Fleisch vnd Blut kan sich nicht ber-
gen / vnd thut ihm schmerz'ich wehe / wenn sich
scheiden sol / von deme / das ihm in dieser Welt hertza-
lich lieb gewesen ist. Begibt sich nu vber zuuer-
sicht / das ein schwerer / vnuerhoffter fall mit hinzu-
schlego /

schlegt / so wird das weinen vnd Flagen desto heff-
tiger / wie wir dessen iezo / leider / Gott sey es gekla-
get / ein fürnemmes exempel für vnsern Augen haben /
an der Christlichen Leich / des weyland Edlen / Ges-
strengen vnd Ehrnuessen Rudolphen von Bünow
auff Krebs / seligen / welchen Gott der Herr den 16.
dieses Monats / nach Mittag vmb 3 vhr / wieder
Menschen verhoffen / vnd doch nach seinem gnädigē
willen vnd wolgefallen / aus diesem betrübten jam-
merthal / zu sich in seinen ewigen frewdensal / mit
gnaden auff vns angenommen. Diejen fall bekla-
get nu hertzlich vnd schmerzglich sine hochbetrübte
hinterlassene Witwe / Bruder vnd Schwestern /
Es beklagen ihñ seine nahe Blutsfreunde / fürneme
Adelspersonen / die ihme iezo den letzten dienst in
dieser Welt erzeiget / vnd das geleit anhero in sein
ruheberlein gegeben haben. Vnd wir andern alle
miteinander / trage mit der betrübten freundschaft
ein Christliches mitleiden / vnd bitten den Allmech-
tigen Gott / er wolle dieselbige Hochbetrümmerte
herzen mit seinem heiligen Geist also erleuchten vnd
regiren / das sie ihren willen in Gottes willen eins-
schliffen / ihre Seelen mit gedult fassen / vnd festiglich
glauben mögen / das dieser verstorbene iuncker nicht
verlohren / sondern nur vorhin geschickt / vnd am
jüngsten Tage zum ewigen leben wieder auffgeste-
hen werde / nach dem wort des H. Herrn Johan: 5. Johan. 5

A iij

W arlich /

Johan. 11.

Warlich / warlich ich sage euch / es kömpt die stunde / vnd ist schon jzt / das die Todten / werden die stimme des Sohns Gottes hören / vnd die sie hören werden / die werden leben. Item Johan: 11. Ich bin die aufferstehung vnd das leben / wer an mich gleubet / der wird leben / ob er gleich stürbe / vñ wer da lebet vnd gleubet an mich / der wird nimmermehr sterben. Auff das wir aber zu diesem mal / bey dieser Christlichen Leichuersammlung / aus Gottes wort / etwas nützlich es miteinander mögen anhören / lernen vnd betrachten / das es gereichen möge Gott dem allmechtigen zu lob / ehr vnd preiß / den betrübtten zu heilsamen Trost / vnd vns allen zu vnser Seelen heil vnd seligkeit / so wollen wir solches durchs gebet erlangen / für Gott dem **HERRN** vns demütigen / vnd im glauben von hertzen sprechen das heilige Vater vnser.

Der prediger Salomon

am 9. Capitel spricht:

Der Mensch weis seine zeit
nit / sondern wie die fische gefan-
gen werden / mit einem schädlichen Harnen /
vnd wie die Vogel mit einem stricke gefan-
gen werden / so werden auch die Menschē
berückt zur bösen zeit / wenn sie plötzlich
vber sie fetter.

In diesen verlesenen wor-
ten / geliebte im H. Ern Christo / füh-
ret der weise man gar eine bittere kla-
ge / vnd betruret den grossen jam-
mer des ganzen Menschlichen geschlechts / das der
Mensch / der doch zu Gottes lob / ehr vnd preis er-
schaffen / so viel vnd mancherley angst / sorg / furcht
vnd dem Tod vnterworffen / vnd das er in so kur-
zer zeit / in so wenig Tagen vnd stunden / frisch vnd
gesund / ja lebendig vnd Tod sein könne: darumb
fasset

frasset er gleich einen jeglichen Menschen / dich vnd
mich / in sonderheit aber junge leut / die ohn alle sor-
ge dahin leben / bey der hand / vnd füret sie zu ein
fischreichen wasser / zeigt mit fingern / vnd spricht /
Sihestu lieber Mensch diese schöne fisch im wasser /
wie sie ihre frewd vnd Kurtzweil haben / vnd nichts
fragen nach diesem fischer / der doch seine Angel vnd
schädlichen Hamen zurichtet / vnd sie bald fangen /
vnd vmb's leben bringen wird. Er gehet fürder
vnd bringet sie zu ein Vogelherd / heist sie stillste-
hen / vnd den zustand desselbigen gar wol betrach-
ten / vnd spricht / sihestu diesen vogelsteller / wie arg-
listig er sein Netz verbirgt / vnd den vogeln nach-
stellet / vnd wie die armen vnuerstendigen vögelein
so hurtig vnd mutig von einem Baum zum andern
flihen / frölig singen vñ guter ding sein / vnd ehe sie
es gewar werden / vmb jr leben kommen: Also hats
auch eine gelegenheit mit dir vnd deinem ganzen
leben / du gehest auch ohn alle sorge dahin / vnd bist
doch vnzalbarer gefahr vnterworffen / du wandelst
vnter stricken / vnd gehest zwischen schlingen vnd
auffgestellten fallen des leidigen Teuffels / vnd wei-
sest nicht die zeit vnd stunde / wenn Gott sein Netz
vber dich werffen / vnd dich dem verderber in die
hede gebē werde. Drum mercke vñ bedencke / mein
lieber freund / das du ein sterblicher Mensch bist / auff
das du allwege klug vnd bereit seiest / bete mit
Moise

III. Wie: Lehre vns bedenden/das wir sterben müs-
sen/auff das wir klug werden. Vnd mit David aus
dem 39. Psalm: Ach Herr/lehre doch mich/das ein Psal. 39.
ende mit mir haben mus / vnd mein Leben ein ziel Psal 39.
hat / vnd ich danon mus. Siehe/meine tage sind eis-
ner handbreit bey dir / vnd mein Leben ist wie nich-
tes für dir / wie gar nichts sind alle Menschen / die
doch so sicher leben. Item / mit der Kirchen ruffe
Gott fleißig an / vnd sprich: Lieber Herr Gott / we-
cke vns auff / das wir bereit sein / wenn dein lieber
Sohn kömmt / ihn mit freuden zu empfangen / zc. auff
das / wenn dich das stündlein plötzlich vberfallet /
du vngehendert / aus der verderbten argen Welt / sel-
lig vnd im Friede dahin fahren mügest.

Dis ist die summa dieses Spruchs / Wir wol-
len aber auff drey stücklein achtung geben / vnd sa-
gen:

I. Von vnsers Herrn Gottes bedenden / War-
umb er vns Menschen die Sterbstund verberge /
vnd ihm dieselbige zu wissen allein fürbehalte.

II. Von dem betrübtten vnd gefehrlichen zu-
stand aller Menschen / wie sie auff mancherley weise
vnd wege zum tode kommen können.

III. Von der Seligkeit der jenigen / so plöz-
lich durch den Tod hinweg gerafft werden / was
daruon zu halten sey.

B

Vom

Vom Ersten Stück.

Wann wir aus der heiligen Schrifft
von der freundlichheit vnd leutseligkeit Gots
hören/das Gott gegen vns/als leibliche Eltern
gegen ihre Kinder gesinet sey/ als wann wir hören/
Psa. 103. das David spricht: Barmhertzig vnd gnedig ist
der Herr/gedultig vnd von grosser güte vnd trewe/
er wird nicht immer hadern noch ewiglich zorn
halten / er handelt nicht mit vns nach vnsern sün-
den / vnd vergilt vns nicht nach vnser Missethat.
Denn so hoch der himmel vber der erden ist / lest er
seine gnade walten vber die so ihn fürchten. So
fern der Morgen von abend ist / lest er vnser vbers-
tretung von vns sein. Wie sich ein Vater vber ein
Kind erbarmet / so erbarmet sich der Herr vber die so
Esa. 41. in fürchten. Item. Esaie: 41. Fürchte dich nicht /
ich bin mit dir / weiche nicht / denn ich bin dein Gott /
ich stercke dich / ich helffe dir auch / ich erhalte dich
durch die rechte hand meiner Gerechtigkeit. So
fürchte dich nicht du würmlein Jacob / ihr armer
hauff Israel / ich helffe dir / spricht der Herr vnd
Esa. 43. dein erlöser / der Heilige in Israel. Esaie: 43.
Fürchte dich nicht / ich habe dich erlöset / ich habe
dich bey deinem Namen geruffen / du bist mein zc.
Esa. 49. Item Esaie: 49. Kan eine Mutter ihres kindleins
vergessen / das sie sich nicht erbarme vber den sohn
ihres

ihres Leibes? vnd ob sie desselben vergesse / so wil
ich doch dein nicht vergessen / sihe / in die hende hab
ich dich gezeichnet. Item Rom: 5. Gott preiset Rom. 5.
seine liebe gegen vns / das Christus für vns gestor-
ben ist / da wir noch sündler waren ꝛc. Da haben
wir gute gedanken / vnd vertrösten vns selber auff
künstiges glück / vnd gedencen / ein frommer Va-
ter warnet sein kind für schaden / vnd verschweiget
ihm nichts was er weis / das ihme möchte schedlich
sein. Ist dann nu Gott vnser Vater / so solt er je bil-
lich die väterliche liebe vnd trew an vns erzeigen /
vnd vns das Jahr / Monat / Wochen / Tag vnd
stund des Todtes offenbaren / oder doch zum we-
nigsten einen Boten vorher lauffen / vnd vns war-
nen lassen / auff das wir vns auff solche Hinnefarth /
daran so viel gelegen / sein schicken vnd bereit machen
könten? Nu spricht aber der Prediger Salomo /
der Mensch weis seine zeit nicht. Vnd Isaac der
Kerzvater Gen: 27. Sihe / ich bin alt worden / vnd Gen. 27.
weis nicht wenn ich sterben sol. Warum verbit-
get er vns vnser sterbstund? Ob wir wol die vr-
sachen / warum vnsrer Herr Gott ihme diese weiß-
heit allein vorbehalten / so gar eigen nicht treffen
können / so werden wir doch / wenn wir mit fleis
Gottes wort betrachten werden / zweierley vrsachē
finden / die nicht zuverwerffen. Die eine heist
Gottes Ehre / die ander / vnser eigen nutz vnd
Bij fromme.

frommen. So verbirget vns nu vnser H^{er}re
Gott das sterbstandlein darnumb/ das es zu seinen
Göttlichen ehren/vñ zu vnsern besten gereichen sol-
le. fragest du/wie kan doch Gottes ehre durch diese
vnser vnwissenheit gesucht werden / were es nicht
viel besser / das wirs wüßten / vnd vns für schaden
hätten könten? Denn wenn die Vogel vnd Fisch
ihr verderben wüßten / so würden sie so leichtlich nit
anbeissen / vnd sich so schendlich vmb ihr leben brin-
gen?

Honor
Dei.

Gen. 14

Dan. 1.

Gar wol kan es zu Gottes ehren gereichen /
Dñ wer ein ding zuuorhin/ehe es geschicht / weis /
dem gereichts zu sonderlichen ehren / wie wir ein
Exempel am Joseph vnd Daniel haben. Da Gott
dem frommen Joseph offenbarte die gute vnd böse
zeit / das sieben reiche Jahr / vnd sieben jare tewe-
zeit / in ganz Egyptenland kommen würdē / da ge-
reichte es dem Joseph zu sonderlichen ehren / er ward
seines gefengnus entlediget / mit weisser seiden ges-
kleidet / der König Pharaon nam den ring von der
hand / vnd gab ihn Joseph an seine hand / hing ihm
ein gülden ketten an seinen Hals / vnd sagt ihn zum
H^{er}ren vber ganz Egyptenland. Da Gott dem
Propheten Daniel offenbarte / wie es mit den 4.
Monarchie vnd Keiserthümē ergehen würdē / ward
er von dem König Nebucadnezar erhöhet / vnd
zum Fürsten vber das ganze Landt zu Babel / vnd
zum

zum Obersten vber alle Weisen gesetzt / Ihs nu ei-
nem Menschen eine grosse ehre / wenn er zukünfftige
ge dinge sihet vnd weis / je wie viel mehr wird es
Gott dem Herrn eine ehre sein / der alles weis vnd
verstehet / ehe dann es geschicht. Psal. 139. Herr /
du erforschest mich vnd kennest mich / ich sitze oder
stehe auff / so weist du es / du verstehest meine gedan-
cken von ferne. Ich gehe oder liege / so bist du vmb
mich / vnd sihest alle meine Wege. Denn sihe / es ist
kein wort auff meiner Zungen / das du Herr nicht
alles wiffest. etc. Gott hat den Menschen geschaffen
aus der Erden / vnd macht ihn wider zur Erden /
vnd bestimt ihnen die zeit ihres lebens. Der Mensch
hat seine bestimmte zeit / die zahl seiner Monden stehet
Herr bey dir / du hast ein ziel gesetzt / das wird er
nicht vbergehen.

7
thio

Psal. 139

Syr. 17.

Job 12

Vtilitas
nostra.

Rom. 8.

Zum andern / gereichts zu vnserm eignen nutz /
vnd frommen. Dis bedäncket vns nu gar wunder-
lich geredt zu sein. Was / sprechen wir / wie kan
das möglich sein / das wir einigen nutz darvon ha-
ben können? es were je tausent mal besser / das wir
die zeit wüßten / denn das wir vnrwissent so schnell
vnd vnersehens vberfallen werden? Paulus
spricht: Wie wissen / das denen die Gott lieben /
ALLE ding müsse zum besten dienen. Sollen nun
alle ding dem Menschen zum besten gereichen / so kan

B ij

thio

ist

auch dieses niemand schädlich sein / das er sein sterb-
stündlein weiß / welchs wir alsdann mercken vnd
verstehen werden / wenn wir der sachen ein wenig
nach gedencken.

Sapi. 2.

Denn ist's nicht war / lieber Christ / wenn wir
die zeit / den Tag vnd die Sterbstund wüßten / we-
ren sein jung / starck / frisch vnd gesund / hetten alles
was vnser Hertz wünschet vnd begehret / vnd het-
ten gewisse Bürgen / das wir noch xx. xxx. xl. Jahr
zu leben / wir würden gar selten / ja nimmermehr nach
Gottes willen leben / sondern der Epicurer liedlein
singen / vnd einer zum andern sprechen / Wolher nu
vñ laß vns wol leben / weils da ist / vnd vnser Lei-
bes brauchen / weil er jung ist / Wir wollen vns mit
dem besten Wein vnd Salben füllen / laß vns die
Neyenblumen nicht verseumen / laß vns Kränze
tragen von jungen Rosen / ehe sie welck werden / vn-
ser keiner las es an im fehlen mit bringen / das man
allenthalben spühren müge / wo wir frölich gewesen
sind / wir haben doch nicht mehr darvon denn das.
Item / Wer nicht thun kan was ihn gelüßtet / der gilt
nichts / etc. Wir würden ohne Busse / ohne Glau-
ben / ohne liebe Gottes vnd vnser Nehesten dahin
gehen / vnd an vnserer Seelen schaden nemen / wie
die zweene reichen Menner Luc. xii. vnd xvi. im
sagß vnd praus dahin lebeten / vnd zum Teuffel in
die

die Helle gefahren sein. Auff das vns nun derglei-
chen nicht auch wiederfahre / so verbirgt vns Gott
das Sterbstündlein / auff das wir allezeit in bereit-
schafft sitzen / vnd auff die zukunfft des Herrn war-
ten sollen.

Hinwiederumb / wenn wir wüßten / das wir
noch lange zeit zu leben hetten / vnd gieng vns vbel /
steckten in armut / in Kranckheit / in schweren schul-
den / weren von jederman veracht / vnd hoffeten von
einem tag zum andern der besserung / vnd würde
doch je lenger je erger? Würden wir nicht aus vns
gedult wieder Gott murren / mit Job vnsern Ge-
burtstag verfluchen / in schwere gedancken gerah-
ten / vnd vns selber / zu vnserm ewigen schaden vnd
verderb / durch verbotene mittel / das leben verkür-
zen? wie der Teuffel manchen Menschen hinter-
krochen vnd betrogen hat.

Wir arme leut wissen aus angeborner schwach-
heit nicht / ob das sterben oder das leben vns besser
sey / wehlen immer zum langen leben / vnd befinden
selten ein äderlein in vns / das sich zum sterben seh-
net / vnd mit Paulo von hertzen spreche: Christus Phil. 1.
ist mein Leben / sterben ist mein gewin. Aber Gott
weis es / der vnser böse complexion vnart vnd natur
gar wol kennet / der es auch trewlich gut mit vns
meinet / der weis / sage ich / das sterben vnser gewin
ist /

ist / Der künnt zu rechter zeit / Der wils / Was vns am
besten ist / er brauche an vns kein arge list / Des sollen
wir ihm vertrauen. Fromme gläubige Christen
trauens auch vnserm HErrn Gott zu / er werde
im leben vnd sterben ihr bestes suchen / wie Job /
Job. 13. David / Paulus / vnd andere gethan haben. Job 13.
Vnd wenn mich der HErr gleich tödten wird / so
Psal. 73. wil ich doch auff ihn hoffen. David Psalm. 73.
Wann ich nur dich habe / so frage ich nichts nach
Himmel vnd Liden / vnd wenn mir gleich leib vnd
Seele verschmacht / so bistu doch Gott allezeit mei-
nes hertzen trost vnd mein theil. Paulus Rom: 14.
Rom. 14. Leben wir / so leben wir dem HErrn / sterben wir / so
sterbē wir dem Herrn / darumb / wir leben oder ster-
ben / so sind wir des HErrn. Rom 8. Ich weis das
Rom. 8. weder Tod noch leben / weder Langel noch Fürstē-
thumb / noch gewalt zc. Vns scheiden kan von der
liebe Gottes / die da ist in Christo Iesu vnserm
HErrn. Also spricht ein Christ zu jeder zeit auch /
Was mein Gott wil / das geschehe allezeit / sein wil-
le ist der allerbeste. Vnd wenn zeit vnd stund kömpt /
so entsetzet er sich nicht / sondern spricht / Tu wil ich
sünder von der welt scheiden nach Gottes willen /
zu meinem Gott / wenns ihm gefelt / wil ich ihm hal-
ten stille. Item / auff ihn wil ich vertrauen in mei-
ner schweren zeit / es kan mich nicht gereren / er
wendet alles leid / im sey es heimgestellet / mein leib /
mein

mein Seel/mein leben/sey Gott dem Herrn ergebē/
er machs mit mir/wie es ihm gefellet.

Vom andern Stück.

Wie die fische gefangen werden / mit
einem schädlichen Hamen / vnd wie die Vo-
gel mit dem strick gefangen werden / also
werden die Menschen auch berückt zur
bösen zeit / wenn sie plötzlich vber sie sel-
let.

In diesen Worten helt vns der Prediger drei-
erley für. 1. Das der Tod auff mancherley weise
vnd wege vns anfallen vnd würgen könne / Dann
es sey ein Mensch wo er wolle / er sey daheim in sei-
nem Hause/auffm Felde/zu wasser oder zu Lande/
er verreise nahe oder ferne / er esse oder trincke/schlas-
se oder wache / es sey Tag oder Nacht / so kan der
Tod an allen orten / vnd zu aller zeit / listiger vnd
tückischer weise / jme nachschleichē / ihn ergreifen vnd
erwürgen / wie der Reim heist / ich gehe aus oder
ein / so stehet der Tod vnd wartet mein. Das dies-
ses gewißlich war sey/bezeuget die erfahrung: Es
gehet mancher nur aus dem Hause / in seinen Gar-
ten /

1.

C

ten /

zen / oder auff's Felt / der meinung halt wieder zu-
kommen / die Hand Gottes rüret ihn / das er alda
bleiben / vnd seinen Geist auffgeben mus. Man-
cher verreiset vber Land / bestimpt eine zeit / vnd ver-
lests mit den seinigen gewiß / wann er wolle wie-
derkommen / aber Gott verbents ime / er mus in der
frembte bleiben. Mancher fehret vber ein wasser /
das Schiff zerbricht / vnd er mus ersauffen. Es ge-
het oft mancher in einer Stadt auff freier gassen
daher / der Tod reißt ein zigel vom Dach vnd trifft
ihn / das er sterben mus. Mancher gehet eine trep-
pen herab / der Tod schlegt ihm ein bein vnter / das
er fallen / vnd die erden drüber krewen mus: Es kan
oft manchem / auß grosser leibes bewegung / oder
wenn er starck hustet / ein ader im leibe zerspringen /
vnd ihn mit seinem eigen Blut ersticken. Mancher
setzet sich frisch vnd gesund zu Tische / vnd kan von
ein bösen bissen / von ein bösen trunck / von ein här-
lein / beinlein / vnd Fischgretlein gewürget werden:
Ja / das noch mehr ist / der Mensch kan vber einer
grossen freude / vber einem starcken Leid / schrecken
vnd trawrigkeit dahin gehen vnd sterben / wie die
Historien genugsam bezeugen.

2. Zum 2. Das alle Menschen ohn vnterscheid /
jung vnd alt / reich vnd arm / Herr vnd knecht / ho-
hes vnd niedriges standtes / böß vnd from / gerecht
vnd vngerecht / gelet vnd vngelert / dem Tod ende

liche 11

lichen einen mordbiß gestatten / vnd sich von ihm
müssen erwürgen lassen / wie der Prediger ein Ex-
empel von ein fischer vnd Vogelsteller vns für au-
gen stellet / das gleich wie dieselben nicht nur allein
die kleinen fisch vnd Vogel / sondern auch die gros-
sen fangen / also werden auch die Menschen (er sagt
nicht von einem oder zweyen / sondern in plurali
numero, von vielen) berückt zur bösen zeit / es
heißt / mors seruat legem, tollit cum paupere regem,
der Tod helt keinen vnterscheid / er erwürget so bald
ein Keiser / König / Fürsten / Grafen / Edelman zc.
als ein armen tagelöner / wie Syrach 40. spricht / Syr. 40
Es ist ein elend jemerlich ding vmb aller Menschen
leben / von Mutterleibe an / bis sie wieder in die er-
den begraben werden / die vnser aller Mutter ist.
Da ist immer sorge / furcht / hoffnung / vnd zu letzt
der Tod / so wol bey deme / der in hohen ehren sitzet /
als bey dem geringsten auff erden. So wol bey
deme / der seiden vñ Kronen tregt / als bey deme / der
einē groben kittel anhat. Die Epistel an die Heb: 9. Heb: 9.
spricht / den Menschen ist gesetzt einmal zusterben.
vnd Syr: 41. Syr. 41. Was wegerstu dich wieder Got-
tes willen zusterben / du lebest zehen / hundert oder
tausent jahr? Denn im Tode fraget man nicht /
wie lange einer gelebet habe. Die kirche singet /
Den reichen hilfft nicht sein gut / dem jungen nicht
sein stolzer mut / er mys aus diesem meyen zc. Den

Cij

gelerten

Geleertē hilfft doch nit sein Kunst / der weltlich pracht
ist gar vmb sonst / wir müssen alle sterben.

3.

Zum 3. Das der Tod die leut mannichmal
gehling vbertrache / wann sie sich seiner am wenigste
verschē / vnd zum sterben sich am vbelsten geschickt
haben / wie die Exempel ausweisen.

2. Sä. 25

Der Reiche Nabal richtet in seinem Hause ein
mal an / wie eines Königes mal / sein hertz war gu-
ter ding / vnd er war sehr truncken. Aber nach we-
nig tagen schlug ihn der H^{er} das er starb.

Acto. 12.

Herodes trieb grossen pracht / liß sich offentlich
für ein Gott anbeten / aber der Engel des H^{er}en
schlug ihn / vnd ward von den Leusen gefressen. Kö-
nig Beljazer machte ein herlich mal seinen gewalts-
tigen vnd Hauptleuten / vnd soß sich voll mit ihnen /
vnd ward dieselbige nacht erschlagen. Das heist /
meine ich / die Menschen berückt zur bösen zeit wenn
sie plötzlich vber sie fellet.

Dan. 1.

Diese betrachtung sol vns nun erstlichen die-
nen / zur Lehre. Das wir lernen gut achtung auff
vnsere leben zugeben / weil es so bald vmb ein Men-
schen geschehen ist.

Lehre.

Zum Andern / zur Warnung / das wir vns für
sünden wieder das gewissen hürten / vnd vnsere her-
zen mit fressen / sauffen / wucher / betrug ꝛc. nicht
beschweren sollen / wie leider viel leut thun / die das
vnmessige sauffen vnd vnzüchtiges weßen für kei-
ne /

War-
nung.

ne /

ne / oder doch ja kleine stünde halten / die Fisch vnd
Vogel art an sich haben / da immer der grösser den
Kleinern frisset vnd verschlinget / dem armen seinen
sawren schweis vnd Blut aussauget / vnd sich mit
ander leut schaden bereichert / aber sie mügen zuse-
hen / das sie nicht der grossen Fisch vnd Vogel un-
glück betreffe / vnd das Netz des verderbens / schnell
vnd plözlich / vber sie gezogen werde.

Zum Dritten / zur Vermanung / das wir nach Verma-
einem andern leben trachten / vnd in der zeit nach ei- nung.
nem andern Haus vnd bestendiger herbrig vns-
umbsehen sollen / sintemal wir in dieser Welt keine
bleibende Stadt haben / sondern die künfftige suchē Ebr. 13.
müssen / wie Paulus vermanet vnd sagt: Suchet Colos. 3
was droben ist / da Christus ist / zu der rechten Got-
tes / trachtet nach dem das droben ist / nicht nach
deme das arff erden ist.

Wenn einer an der feinde Grenze wonet /
vnd sich teglich der streiffenten rot vnd vberfals
versehen mus / der siehet vndorget / wie er das seine
möge hinweg bringen / vñ sich in eine vhestung ein-
legen: Also sind wir auch an der feinde Grenze /
ja mitten vnter solchen feinden / die vns den Tod
geschworen haben / mit welchen wir teglich kemp-
fen vnd streiten / vnd des vberfals von ihnen ge-
werdig sein müssen. Drumb wil vns gebüren mun-

C ij

der

der vnd wacker zu sein / vnd nach der himlische wou-
nung zu trachten.

Vom Dritten Stück.

Also werden die Menschen berückt
zur bösen zeit / wenn sie plötzlich vber
sie fellet.

In diesen worten redet der Prediger Salomo
vnter andern auch vom schnellen Tod / vnd spricht /
das er allen Menschen wiederfahren könne / omni-
bus accidere potest, omnibus quod accidit, was einem
Syr. 38 heut begegnet / kan dem andern Morgen auch be-
gegnet / Syrach spricht / hodie mihi, cras tibi, heut
ists an mir / morgen ist an dir.

Diueil wir dann den modum moriendi nicht
wissen / auff welche weise vns vnser H. Erre Gott
werde abfordern / obs geschwinde oder langsam
werde zugehen / so last vns alhier auff die frage gut
achtung geben / was doch von deren personen selig-
keit zu halten sey / die so vnuersehens vnd plötzlich
vom Tode hingerissen werden / ob sie dann auch so
selig sterben / als die / die bey guter weile vnd mit
guter vernunft ihren abschied nemen / vnd mit
tröstlichen reden ihr leben beschliffen. An dieser fra-
ge ist vns sehr viel gelegen / sonderlich weil wir jzt
ein Exempel für augen haben.

Denn obwol rohe vnd sichere leut sich hier

umb nicht gros bekümmern / vnd vermeinen / es sey
dann zeit genung / wenn mans dort in der andern
Welt erfare: So macht es doch den jenigen / die
es angehet / vnd denen Gott die ihrigen durch den
schnellen Tod / aus den augen gerissen / offft schwere
gedancken / vnd vergebliche nachrechnung / das sie
sich schmerzlich bekümmern / vnd das hundert ins
tausent gedancken / Ach / wenn du diß gethan / vnd je-
nes hettest nachgelassen / wenn du werest daheim
blieben vnd nicht ausgereiset zc. so würde er noch
bey leben sein. Halt bekümmern wir vns vmb sei-
ner Seelen seligkeit / wer beharret bisz ans ende der
wird selig werden / Matthei: 24. Ach wenn er Mat. 24
doch nur zuvor sein bekenntnis hette thun / vnd sich
mit Gott versöhne können. Ach wenn er nur selig ge-
storben were zc.

Diß sind Geliebte im H. Ern / nicht geringe /
sondern schwere vñ gefehrliche gedancken / dadurch
das hertz getrencket vnd höchlich betrübet wird :
vnd ist freilich der vernunfft nach / viel feiner vnd
tröstlicher / wenn einer von ein sterbenden Men-
schen sein bekenntnis vnd trostsprüche höret / Also Joha. 3.
hat Gott die Welt geliebet / das er seinen einigen
Sohn gab / auff das alle / die an ihn glauben / nicht
sollen verlohren werden / sondern das ewige leben
haben. Christus ist mein leben / sterben ist mein Phil. 1.
gewin. Item vnser keiner lebet ihm selber / vnd Rom. 14
vnser

77
vnsrer keiner stirbet ihm selber zc. In deine hende bes
Psal: 31. fehle ich meinen Geist / du hast mich erlöset du tres
wer Gott: Als wenn einer bey ein sprachlosen
Francken stehet / vnd viel mit ihm red / vnd doch
nicht weis / ob ers vernommen / vnd ob er bis an sein
ende bestendig im Christlichen glauben verharret
habe.

Wer nu hiervon gründlichen bericht zu wiss
sen begeret / wie ihn den jederman begeren sol / sintes
mal vnsrer keiner weis / ob ihn Gott ins künfftige /
nach seinem Raht auch also abfordern möchte / der
sol wissen / das zweierley gehlinger Tod sey / ein bö
ser vnd ein guter. Für dem bösen schnellen Tod ist
wol zu bitten / wie die Christliche Kirche in der Ly
taney von hertzen Gott anruffet / für bösem schnel
len Tod / behüt vns lieber H. Erre Gott. Denn
wenn ein Mensch in seinem leben böse / Gottlos vnd
vnbussfertig gewesen / nach Gott / seinem wort / vñ
dem heiligen Abendmal nichts gefraget / in vnuer
sönlichem zorn / neid vnd haß gelegen / vnd in solche
Gottlosen wesen mit dem schnellen Tod vberreitet
worden / da ist freilich an desselben Menschen seelen
seligkeit höchlich zu zweifeln / wie Doctor Luther
saget / Vix bene moritur, qui male vixit, da heißt freis
lich / qualem te invenio, talem te judico, wie ich dich
finde / so richte ich dich.

Wenn aber ein Mensch in seinem vorhergehens
den

den leben Gottsfürchtig gewesen / Gottes wort
 vnd die liebe Predigt nicht verachtet / sondern heil-
 lig gehalten / gern gehöret / gern gelernet / vnd des
 jahrs zu etlichen malen / durch die verordente mit-
 tel der heiligen Absolution vnd hochwürdige Abends-
 mal / des waren Leibes vnd Blutes Jesu Christi /
 zu sterckung seines Glaubens / mit Gott versöhnen
 lassen / deme kan der schnelle Tod nicht schedlich sein /
 sondern mus ihme zum besten gereichen / welches
 wir daher mercken vnd abnemen können.

fol

Erstlich / das die heilige Schrift der Chri-
 sten schnellen Tod / nirgends schedlich vnd böse ge-
 nennet / sondern zu allen zeiten denselben Tod / er ge-
 schehe wie er immermehr wolle / für Gott hoch vnd
 tewer geachtet habe / wie David Psalm. 116. Psal. 116
 spricht / *præciosa mors sanctorum in conspectu Domini*
 der Tod seiner Heiligen ist werd gehalten für
 dem H^{er}ren. Er saget nicht *perniciosa*, schedlich /
 sondern *præciosa*, hoch vnd tewer / Ist den der Tod
 der Christen für Gottes Angesicht tewer vñ werd /
 köstlich vnd seliglich geachtet? so wird je der schnel-
 le Tod ihnen nicht können verdamlich sein. Wie
 solches mit viel frommer heiliger leut Exempel / die
 plözlich gestorben / kan erwiesen werden. Abel
 ward plözlich vnd vñnersehens erschlagen / Gen. 4. Gen. 4.
 Jonathas / Sauls frommer Sohn ward von den 1. Sam.
 Philistern erschlagen. Die frommen Hauptleut 31.
 Amasa

D

Amasa

bes
 tres
 sen
 och
 sein
 eret
 wis
 tes
 ge /
 der
 bö
 ist
 Ly
 mel
 nu
 vnd
 vñ
 ers
 che
 let
 len
 her
 reis
 ich
 ens
 den

2. Sam
3. 20.
Amasa vnd Abner wurden von dem Joab heimlich
scher vnd tückischer weise / ehe sie sichs versahē / ersto-
chen / Johannes der Euangelist ist in der Kirchen zu
Epheso / vnd der Prophet Malachias / wie Epi-
phanus schreiber / des gehlengen Todes gestorben /
vnd diese alle sind nicht verdammet / sondern / ohn
allen zweifel / selig worden.

Wie offr wird Gottseligen Keisern / Königen
vnd Fürstlichen Personen mit Gifft vergeben /
vnd zweifelt doch niemand an ihrer Seelen selig-
keit.

Augustinus spricht / Deus non attendit in homi-
nibus quali occasione exeant, sed quales exeant :
Gott sihet nicht auff die weise des Todes / sondern
wie einer geglaubet vnd gelebet hat / ehe er stirbet.
Wer zweifelt doch an Jobs Kinder seligkeit? Ob
sie schon plötzlich vnd schuel sind vom Hause erschla-
gen worden / wie Job solches selber mit dem wört-
lein abstulit zuuerstehen gibt / Dominus dedit, domi-
nus abstulit, Der H^{er} hat gegeben / der H^{er} hat
genommen / da das wörtlein abstulit nicht heis-
set / ein ding seuberlich angreifen / vnd langsam an
ein ander ort legen / sondern es heist schnelle vnd
flugs hinweg raffen / Sap: 4. Stehet vom Tod
der frommen / das er offr eilends geschehe / Der ge-
rechte wird weggenommen aus dem leben / vnter
den sündern / vnd wird hingeruht zc. Item / Gott
eilet

eilet mit ihme aus dem bösen leben / denn seine seele
gefellet Gott wol / vnnnd Esaie. 56. Heilige lert Esa. 56.
werden auffgerafft / vnnnd niemand achter drauff /
vnd die gerechten werden weggerafft für dem un-
glück. Was aber das auff vnd weggeraffen sey / ver-
stehen wir alle wol. Wenn ein Haußvater in der
ernde schnitter hat / vnd Garben binden lest / vnd ein
vnuerschenes vngewitter vnnnd Blatzregen kömpt /
da lest er alles stehen vnd ligen / laufft vnd rafft die
Garben auff / vnd eilet mit ihnen in die Mandel /
oder in die scheunen / nicht das er den Garben gram
sey / sondern das er sie ins trocken bringe : Also eilet
Gott mit seinen Christen auch hinweg / nicht das
ers böse mit ihnen meine / sondern das er sie nur
für dem künfftigen vnglück zur ruhe bringe. Diese
einige vrsach vnd erzehlte sprüche / solten zum trost
gnug sein / allen den jenigen die eine zeitlang böse ge-
danken wegen des schnellen Todtes der Christen
gehabt haben.

Zum Andern / das die Christen vnd ihre leiber 2.
Tempel vnd Wohnungen der heiligen Dreyfaltig-
keit gewesen / wie Christus Johan: 14. spricht / wer Johā. 14
mich liebet / der wird mein wort halten / vnd mein
Vater wird in lieben / vnd wir wollen zu ihm kom-
men / vnnnd wonung bey ihm machen. 1. Cor: 3. 1. Cor. 3.
Wisset ihr nicht / das ihr Gottes Tempel seid / vnd
der Geist Gottes in euch wonnet ? 1. Cor: 6.

Dij

Wisset

Wisset ihr nicht / das ewer Leib ein Tempel des heiligen Geistes ist / der in euch ist / welchen ihr habt von Gott / vnd seid nicht ewer selbst? Dann ihr seid rewer erkauft. Ist nu dieses war / wie es dann war ist / vnd ewig war bleibet / so mus je folgen / das kein schneller tod / vñ wenn er hundert mal schneller were / den Christen an ihrer seligkeit könnte hinterlich sein.

3.

Zum Dritten / das glaubige Christen fleißig beten / vnd sich frue vnd spat / mit Leib vnd Seele / in die hende des Allmechtigen befehlen. Dann so sprechen sie im morgen vnd abend seggen / Ich befehle mich dir / mein Leib vnd Seele / vnd alles in deine hende / dein heiliger Engel sey mit mir / das der böse feind keine macht an mir finde. Vnd im Vater vnser / **H**err / vergib vns vnser schuld / wie wir vergeben vnsern schuldigern / **H**err gedendke nicht der sünde meiner jugent / vnd meiner vbertretung / gedendke aber meiner nach deiner grossen Barmherzigkeit vmb deiner güte willen. Item / so du **H**err wilt sehen an / was sünd vnd vnrecht ist gethan / wer kan **H**err für dir bleiben? Solt aber diß tegliche Gebet vmb sonst vnd verlohren sein? Das were wieder Gott vnd sein heiliges wort.

Darumb es geschehe an ein Christen Menschen ein vnraht / frue oder spate / in der jugent oder im alter / er sterbe bey Tag oder bey Nacht / plötzliche
oder

oder langsam/ er könne reden/ oder lige sprachloß/ so
ist es Gott zuvor hin alles befohlen gewesen/ vnd er
kan nicht vbel gestorben sein.

Zum Vierten vund Letzten / das wir vns alle 4.
mit einander eines schnellen Todtes versehen müß
sen / wegen des herzunahenden jüngsten Tages /
welcher vnuersehens wie ein fallstrick / vnd wieder
Pliß kommen wird / Matthei 24. solten wir aber Mat. 24
derentwegen an vnser Seelen seligkeit zweifeln /
wenn wir so geschwind vberfallen würden ? Da sey
ja der liebe Gott für.

Wir sind zwar arme sündler / wir leben vnd
sterben auch sündler / aber Bußfertige / welchen
Gott die sünde zuergeben verheissen vnd zugesag
get hat / Ezech: 33. So war als ich lebe / spricht Ezech. 33
der HErr / HErr / ich wil nicht den Tod des sün
ders / sondern das er sich bekere vnd lebe. Es ist
gewißlich war / vnd ein tawer werdes wort / das
Iesus Christus darumb ist in die Welt kommen /
die sündler selig zu machen 1. Tim: 1. Darumb 1. Tim. 1.
mag ein jeder zu aller zeit gut achtung auff sich sel
ber haben / das er sich nicht in sünden wieder sein ges
wissen / finden lasse.

Diß sey also gnugsam auff dieses mal / nach
stziger gelegenheit / vom verlesenen Text / da wir
gehört haben.

1. DAS

I. Das vnser H^{er} Gott vns Menschen die
sterbstund darumb verberge / das dadurch seine
Göttliche ehre/vnd vnser nutz vnd frommē gesucht
werde.

II. Das der Tod auff mancherley weis vnd
wege/ alle Menschen/ keinen ausgeschlossen/ plöz-
lich anfallen vnd würgen könne / welches vns zur
Lehre / warnung vnd vermanung dienet / das
wir teglichsterbende Menschen / vns für allerley
sünden wieder das gewissen hütten/vnd vns in der
zeit / nach einer bestendigē vnd bleibenden wonung
vmbsehen sollen.

III. Das frommer glaubiger Christen schnel-
ler Tod / nicht verdamlich / sondern ihnen nützlich
vnd seligliche sey/wie wir aus viererley vrsachen er-
wiesen haben / dessen sich Christliche hertzen / die es
betroffen /vnd die es künfftig betreffen möchte/an-
nehmen vnd trösten sollen.

Wo nun den weiland Edlen / Ge-
strogen vnd Ehrenvesten Rudolphen
von Bünau / vff Krebs / seliger gedecht-
nis / dessen Leiche wir jzt in dieser versammlung /
mit gebürlichen Ceremonien / zur erden bestatten
wollen / anlangen thut / weis Ewer liebe zimlicher
massen sich wol zuerinnern / was er ankünfft vnd
herkoms

herkommens er gewesen / wie es vmb seine person /
seinen Glauben / leben vnd ernde beschaffen / vnd ist
nicht von nöten dasselbige weitlaufftig alhier zu
wiederholen. Aber mit kurzen Worten darvon
zureden / vnd die warheit zusagen / ist er von fürnem
men Christlichen vnd Gottsfürchtigen Eltern er-
zeuget. Sein Vater ist gewesen / der Edle / Ge-
strenge vnd Ehrenueste Günther von Bünow auff
Krebs / vnd seine fraw Mutter / fraw Elisabeth /
Geborne Bünin vff Detzchen / beyder Christlicher
vnd seliger gedechtnis. Wie nu die Eltern from
vnd Gottsfürchtig gewesen / also haben sie auch
diesen ihren Sohn von jugend auff / in Gottes
furcht / guten sitten / vnd Adelichen tugenden erzo-
gen.

Seine Person / leben vnd wandel anlangende /
ob er wol von natur kein heiliger Engel / sondern
ein Mensch / ein armer sündler / vnd ein kind des
zorns gewesen / wie wir alle miteinander auch elen-
de vnd gebrechliche leut sein / in sünden empfangen
vnd geboren / wie S. Paulus spricht / es ist hie
kein vnterscheid / sie sind allzumal sündler etc. So
hat er doch seine anlebende mengel vnd gebrechen /
aus Gottes wort allezeit erkant / hertzliche reu vñ
leid darüber gehabt / vnsern HERN Gott treulich
abgebeten / vnd sich mit ihme / durch das heilige
Hochwirdige Abendmal / des jahrs etlich mal /
wieder:

Psal: 51.
Rom. 3.

wiederumb versönet. Er war ein Gottsfürchtiger / züchtiger / ehrlicher vnd auffrichtiger vom Adel / wie ihme neben mir gut zeugnis geben werden alle die mit ihm vmbgangen vnd ihn gekant haben / das er ein demütiger / freundlicher / stiller vnd friedliebenter Man / vnd eine fromme Seele gewesen ist. Im Ehestand hat er gar eine kurze zeit / noch nicht drey jahre gelebet / vnd mit seiner vielgeliebten haubtwehre / Frawen Sara / Geborne Schönbergin vff Keinsberg / zwey Pflanzlein / dulcissima pignora lecti, gezeuget / vnd als arme weislein nach sich verlassen.

Was sein ende belangen thut / werde ich von Glaubwürdigen leuten / die stets vmb ihn gewesen / berichtet / das er eine geraume zeit mit sterbens gedanken vmbgangen / welche er auch seinem lieben Weib vnd freunden geoffenbaret. Am verschiennen Sonntag 14. Tage / war der 16. dominica post Trinitatis, als er zum letzten mal in dieser kirchē die Predig von der Witwen Sohn zu Nain / mit fleis angehört / hat er nach verrichtete Gottesdienst alhier auffm Schlosse / ehe er sich zu Tische gesetzt / gesagt / ich bin heut in der kirchen gewesen / vnd mir meine Grabstete ausgesehen / wo ich ligen wil / vnd sich darauff zu seinem Bruder gewand vnd gesprochen / du magst immer den Leichstein verfertigen lassen / du wirsts sehen / ich werde nicht lange leben. Die folgende Tage / als er in Böhmen verreiset / vnd
nach

nach verrichteter sachen/auffm ruck wege sich vbel be-
funden / etlich mal starck gehustet / vnd miltiglich
Blut ausgeworffen / also / das es von ihme geflossen /
ist er vom Pfert herab gestigen : / : nicht gefallen /
wie die gemeine sage gangen / den er damals nicht
tern vnd nicht truncken gewesen : / : mit dem Haupt
sich ans Pfert gelehnet / vnd zu seinem jungen ges-
sagt / Hilff Gott was wil das werden ? Nu wird
meines lebens nicht mehr sein / vnd alsbald nach
einem Wage geschickt / vnd sich gen Römischen Kö-
nigen führen / vnd seiner alda pflegen vnd warten
lassen. Am selbigen ort aber hat er nicht allein fleis-
sich Gebetet / vnd sich / sein Leib vnd Seele / Weib
vnd Kinderlein Gott in seinen schutz vnd schirm be-
fohlen / sondern auch den Pfarrer daselbst zu sich for-
dern vnd ihme Lehrhafte vnd Trostreiche sprüche
aus Gottes wort fürsagen lassen. Welches je als
les miteinander lauter lebendige anzeugungen
sein / eines Christliche vñ Gottsfürchtige hertzens /
welches wir / zum oberfluß / auch dabey abnemen
können / das / so bald er zuhause kommen vnd sein klei-
nes Söhnlein / welches im entgegen gelauffen vnd
sich freundlich erzeiget / angesehen / er Gott dem
Herrn von hertzen gedanckt vnd gesagt / O du lie-
bes kind / ich dachte nicht / das ich dich wieder sehen
würde / ey Gott sey es gedanckt / das ich noch lebend-
ig anhero kommen bin / vnd das er seinen Seel-

Diij

forger

forger / den Herrn Pfarrer zu Dohna alsbalt beges-
ret / ohn allen zweifel / das er ihn aus Gottes wort /
in vberfallener schwachheit trösten / vnd die heilige
Absolution mittheilen solte. Vnd ob er wol seiner
zukunfft nicht erwartet / sondern bald hernach / als
er sich zu ruhe legen wollen / vnd der Husten vnd
Blut auswerffen wiederkommen / von Gott dem
HERRN / durch den Natürlichen Tod / von dieser
welt abgefördert worden / als er 31. Jahr vnd 8.
Wochen gelebet / so schliffen wir doch gantzlichen
dahin / das / weil er ein getauffter Christglaubiger
Mensch vnd Gottsfürchtig gewesen / Gott fleißig
angeruffen / vnd seiner Göttlichen Allmacht / in des
mut vnd herzlichem vertrauen / Leib vnd Seele
befohlen / er sey seliglichen von hinnen geschieden / vñ
zu ruhe kommen / vnd lebe jzt in einer solchen frew-
de / die kein ange gesehen / kein ohre gehöret / vnd in
keines Menschen hertz kommen ist / er neme nicht al-
ler welt gütter / wenns jm gleich möglich were / das
er nur ein Tag oder eine stunde zu vns in diß elend
wieder kommen solte.

1. Cor. 2.

Diese Himlische frewde vnd ewige ruhe / gön-
nen wir ihme semplich vnd sonderlich von hertzen /
vnd bitten den Allmechtigen Barmhertzigigen Gott
vnd Vater vnser HERRN Jesu Christi / der ein Va-
ter der waisen / vnd ein Richter der Witwen / vnd
ein Gott alles trosts ist / Er wolle alle betrübe vnd
trawrige

Pfal. 68

2 Cor. 1.

erwrigē / vñ sonderlich die Hochbetribte Adelige
Witwe / im hertzen selber trösten / vnd gnediglichē
verleihen / das sie sich dem willen Gottes / der nicht
kan geendert werden / vnd alle zeit der beste ist / ge-
horsamlich vnterwerffen / vnd dis grosse schwere
Creutz / durch seine hülff / mit Christlicher gedult
vberwinden möge.

Vns aber allen semplichen vnd sonderlichen /
niemand ausgeschlossen / wolle der fromme getrewe
Gott / wenn vnsere Sterbständlein herzu kommen
wird / auch ein seliges ende / vnd am jüngsten Tage /
neben diesem in Gott ruhenden Juncfern vnd allen
aufferwelten / seine fröliche aufferstehung zum ewi-
gen leben verleihen / vmb seines lieben Sohnes Jesu
Christi willen / Amen.

Bernhardus.

Iusti mors subita, quam præcessit bona vita,
Non tollit merita, si moriatur ita.

Kein schneller Tod dem Gerechten schadet /
Wenn er nur from ist frue vnd spat.

9a 4296 Wk

[Faint, mostly illegible text, likely bleed-through from the reverse side of the page.]

Bartholus.

Infirmos cubita, quam precepsit bona vita.
Non tollit membra, si moriantur ista.

[Faint, mostly illegible text, likely bleed-through from the reverse side of the page.]

WNA

M



QK 2881




Christi
Des
gen vnd
von Dina
bris, des 16
Gott sanfte
den 20. des



Gedr

Inm Westm
sonnigkain




Inches 1 2 3 4 5 6 7 8
Centimetres 1 2 3 4 5 6 7 8

Kodak
LICENSED PRODUCT

KODAK Color Control Patches © The Tiffen Company, 2000

Blue Cyan Green Yellow Red Magenta White 3/Color Black



398
n-
ben

cto
r / in
rnach
ebe



im,

B

x.
Hans Wolffen von
Inigker autor stat.
Bio

